

Wakil Pulau Pinang Cadang Penubuhan Jawatankuasa Disiplin Pilihan Raya Umum mStar Online

Disember 2, 2011

Oleh SALWA SHA'ARI

KUALA LUMPUR: Umno Pulau Pinang pada Jumaat, menyarankan agar satu Jawatankuasa Disiplin Pilihan Raya Umum bagi mengambil tindakan terhadap ahli parti tersebut yang belot.

Wakilnya, Datuk Musa Sheikh Fadzir berkata, penubuhan jawatankuasa tersebut adalah penting kerana kemenangan pada Pilihan Raya akan menentukan nasib parti.

"Macam mana nak menang jika kita sendiri tak tegas dalam parti?," katanya semasa membahaskan usul ucapan dasar Presiden di Perhimpunan Agung Umno di sini.

Ketua Umno Bahagian Bukit Mertajam itu seterusnya memohon agar Presiden parti, Datuk Seri Najib Tun Razak akan mendengar pendapat rakyat mengenai calon yang dikehendaki mereka.

Beliau juga menyatakan persetujuan jika seorang calon luar di bawa masuk ke kawasan yang tidak mempunyai calon boleh menang, tetapi berharap agar calon yang dibawa itu adalah 'calon yang boleh memberi salam apabila masuk ke dalam rumah'.

Seterusnya, Musa menyarankan agar calon-calon luar ini diberi kursus di Institut Latihan Memperkasa Umno untuk memberi pendedahan mengenai cara berkempen di kampung.

Hakcipta Terpelihara © 1995-2011 Star Publications (Malaysia) Bhd

Source:

http://mstar.com.my/berita/cerita.asp?file=/2011/12/2/mstar_berita/20111202154528&sec=mstar_berita